

Thursday, February 27, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

NITI WEP CHAPTER

Chief Minister Pu Lalduhoma'n Mizoram ei leh bar ti hmasawn turin hmeichhia ten an thawhhlawk hle a ti a, theihna sang tak an nei tih sawiin hmasawn zelna tur tam tak a awm tih a sawi.

He thu hi vawiina Mizoram University Auditorium-a NITI Aayog State Support Mission hmalakna hnuaia Women Led Development through Entrepreneurs workshop a hman pui na ah sawiin Chief Minister chuan, India hmarchhak a NITI WEP chapter bultan nana Mizoram an rawn thlan avangin NITI Aayog thuneitute chungah lawmthu a sawi a. Mizoram economy-ah hmeichhiaten an thawhhlawk hle tih sawiin sawrkar chuan thalai leh mahni kutkawih eizawna bultan te tan tanpuina tur Bana Kaih hnuaiah a ruahman a ti a, pilot phase-ah Progress Partner 517 te chu thawhpui turin an thlang tih sawiin an zinga 140 (za zela 27%) chu hmeichhia an ni tih sawiin scheme chu hmeichhe tam zawk ten an chhawr zel a beisei a ti a. NITI Aayog chu Bana Kaihah leh Scheme dangah thawkho turin an inpeih reng tih a sawi baw.

NITI Aayog Member Dr. VK Paul pawhin thusawiin, Mizorama hmeichhia mahni kea dinga, sumdawna kalpuiten Women Entrepreneurs Platform chu an tangkaipui ngei dawn a ti a, A tam thei ang ber WEP ah inziak lut se an duh tih sawiin Hmeichhiate tihhmasawn chu India ram ram changkang a thlen theihna tura tihmakmawh a nih avangin Prime Minister-in a ngaipawimawh a, NITI Aayog in nasa takin an bawhzui tih sawiin NITI Aayog in WEP kal tlanga hna a thawh dan tlangpui a tarlang baw.



FILM WORKSHOP

I&PR Minister Dr. Vanlalhlana'n Mizo thalaite chu khawvel hmuh ah an thiamna leh theihna phochhuahna atan Film hmang tangkai thiam turin a duh tih a sawi.

Information & Public Relations Department buatsaih ni 2 awh 'Film Workshop for local Film makers' a hawna ah he thu hi sawiin Dr Vanlalhlana chuan Film chu khawvel leh India ram ah ngei pawh Industry changlung sa tak a nih thu sawiin film lama tui Mizo thalaite chuan khawvel hmuh ah an thiamna leh theihna phochhuahna atan leh eizawna kawng a dinchhuah nan

hmang tangkai thiam turin a chah a. Film siam in a ken tel lemchan thiam bak ah script ziah, rimawi leh thuam inbel tur ngaihtuah te, make up chi hrang hrang hmanthiam chu Film Industry peng pawimawh tak a nih thu Minister chuan sawiin heng lam a tuimite pawh hian Film Industry an hman tangkai thiam a pawimawh thu a sawi.

Dr. Vanlalhlana chuan I&PR department buatsaih Film Workshop-a tel film siam thin te, film siam leh chan lam a tuimite leh zirlaite chu Workshop atang hian thil thar an tangkaipui tur leh hmasawnpui tur zirchhuak ngei turin a chah a, khawvel huap ang pawh a zahpuiawm loh kutchhuak neih tum turin a fuih bawk.

Ni hnih awh 'Film Workshop for Local Film makers' ah hian Pu Joshy Joseph, Kochi Kolkata Cocktail Production chu Resource Person a ni a. Workshop kalpui chhung hian 'Story telling technique', 'Importance of Sound design' bak ah Grant Thornton atangin 'UNNATI for Film Industry' tih thupui hmangin zirtirna neih a ni dawn a ni. I&PR buatsaih Film Workshop-ah hian Mizo film Director, Actor, Videographer, film siam lam a tuite leh MZU atangin Mass Communication department zirlaite an tel a ni.



CONGRESS PRESSCONFERENCE

Mizoram Pradesh Congress Committee chuan tunhnaia Sawrkarin sawhthing a lei ah sawhthing chingtute dem zawnga thusawi a awm chu pawl antih thu sawiin Department lamin sawhthing an lak khawm kawnga an fimkhur lohna ah sawrkar chu hma la ngam turin an phut tih an sawi.

He thu hi vawiina Aizawl Press Club-a thuthar thehdarhtute an kawmna ah sawiin Congress Farmers Department Chairman Pu Lalrinliana chuan tunhnaia ZPM Sawrkarin Sawhthing an lei chungchanga a chingtute dem zawnga thu an sawi chu pawl atih thu sawiin a la khawmtu sawrkar fimkhur lohna ah mawhpurhna la ngam zawk se an duh thu an sawi a, ZPM Sawrkar chu a intiam ang ngeia kuthnathawktute chin sawhthing chu lei sak vek se an duh tih sawiin an rate bituk cheng 50-a lei sak vek turin an phut tih an sawi.

MPCC chuan sawrkarin sawhthing a lei danah ngaih thatlohna tam tak a awm tih sawiin khaw hrang hranga lei tura an ruahman zingah a vaia lei loh a tam an ti a, kuthnathawktuten hah taka an thawhchhuah anih avangin sawrkar chu a thutiama ding a, mipuite ti hnual lo turin an ngen tih an sawi bawk.



RNU DISCUSSION PRE PUBLICITY

Akashvani Aizawl Regional News Unit buatsaih thupui hrang hrang hmanga mithiamte thusawina hun RNU Discussion ah vawiin chawhnu dar 3 leh a chanve hian Ruihhlo Do kawnga Sawrkar leh tlawmngai pawl hmalakna sawihona tihchhuah a ni dawn.

Vawiin chawnua RNU Discussion Nasha Mukht Bharat Abhiyan tih thupui hmanga sawiho turah hian Social Welfare Department Director Dr Lalhriatzuali Ralte leh Central YMA General Secretary Dr Malsawmliana ten mipuite hriatttur pawimawh tak tak an sawi dawn a, Ruihhlo Do kawnga sawrkar leh tlawmngai pawl hmalakna bakah hmachhawp hrang hrang te an sawi dawn a ni.

RNU Discussion hi tun thla February leh thla leh March thla chhunga neih tura ruahman a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar hi puan leh a ni ang.

